

che è stà creato per el signor Gazeli signor in ditto loco, a uno moro vecchio di la terra, che lui havesse a tuor la Signoria e star vice signor fin che lui de li venisse. Et cussi feceno, per il che la terra era pacifica et cadauno era sicuro et questo per el comandamento del signor Gazelli; el qual vice signor, el zorno sequente, con homeni de la terra et vilani de li contorni dovea dar la bataglia al castello, per esser inimicissimi de turchi et molto sviserati del signor Gazeli. Li navili de turchi se atrovavano in dito porto tutti, vedendo la sua rovina, se levorno et se departino.

Et nel zorno di Mercore, che fo a di 7 dil presente, havessemo da Baruto come el signor Gazelli haveva electo in dito loco per signor Mir Giege, el qual *cum* assaissimi drusi era intrado, et dui giorni aveva combatuto la torre, ne la qual era da turchi zercha 40, et hebbe ditta torre a description, ne la qual trovò de contadi de danari del signor Gran turco de ducati 30 milia de quella moneda, li quali furono tolti per nome dil ditto signor Gazelli. *Item* se hanno, come nel paese de Sael et de tutta la piana el signor Gazelli haveva creato signor el fiol de Beneanes. *Item*, el jera partito dal signor Gazelli Benedachar Machademo suocero di esso signor Gazeli per il Chayro, el qual fa da cavalli 20 in 25 milia ne le contrade dil ditto loco del Chayro, per sublevar quelli populi, e da schiavi 2000 se atrova in dito loco, per far tajar a pezi turchi *cum* Chairbech, se 'l dicto non voleva descender a la voluntà del ditto signor Gazelli; la qual impresa se ha per facile hessendo turchi malissimo visti. *Item*, se ha el ditto signor Gazelli havea electo per signor in Aman Campson el Macharcha, et in Umps Azlam, che è zerman cusin de Alibei Benesuar signor dil paese de Marassi, che è di Aliduli la parte foraussita.

315 El ditto signor Gazelli ha per suo capitano del exercito uno dil paese de Diarbech, homo valentissimo et di gran auctorità.

Se ha *etiam*, come Medeles Machademo del paese de Diarbech, el qual fa da 12 in 14 milia cavalli, inimico de turchi, si ha facto homo del signor Sophi et ha levato la bareta rossa; el qual ne li zorni passati corse verso el Byr, et ha tagliato da turchi a cavallo 700, et ha preso Benecurcumas signor del ditto loco del Byr, el qual fu quello amazò Beneanes. El qual Medeles se dice esser grandissimo amico del signor Gazelli.

Se dice *etiam*, che el dito signor Gazelli in tal occurrentie fa quella bona compagnia et ciera a nostri mercanti che è possibile a dir, havendo fato in-

tender al clarissimo Consulo, vogli scriver a la illustrissima Signoria in sua recomandation. Et se dice che ancora lui scrive, dando notitia che se per l'advenire turchi armerano, essa Signoria non vogli star anche lei de armar, che a esso signor Gazelli li basta l'animo con sue zente et favor averà, de correr tutto el paese de la Natolia fin su el Streto, et di questo ne ha dà particular notitia al signor Sophi.

El prefato signor Gazelli se partite da Damasco a di 2 del presente Venere da poi el Sadular, per la impresa de Aleppo *cum* exercito grandissimo, nel qual, tra schiavi, zente del paese et araba et turchi haverà da cavalli 15 in 16 milia, pedoni da altri 20 milia, ne li quali era da 600 schiopetieri, et carete 36 de artelarie, e per strada era per trovar et menar con lui brigate assai. Se dice, quelli di Aleppo li haveva mandato ad oferir arcieri 80 milia de la tera et contorni.

Se ha certo, turchi non aspetterano per esser pochi e mal volesti da tutto el mondo. Del castel di ditto loco tegno averà qualche difficultà per essere alquanto forte; nel qual se atrova veramente da tre miliona de ducati di quelle monede.

El modo di prender dil castello di Damasco fo in hore 4, parte per forza, et il resto si rese a pati. Havendo visto il castelan del Signor turco dil dito loco la perdeda de esso castello, per non andar in le man del signor Gazelli per esserli stà sempre inimico, amazò la moglie et do fioli, e lui se butò zoso de una torre in sua malhora.

*Copia di un capitolo di una letera scritta in 315**

Tripoli a di 6 Novembrio al tardi, de mano de domino Cristoforo de Negro zenoeze, mandata, per le galie nostre, qui in Famagosta a domino Batista Spinola.

Da novo, come per altre ve dixi, se intese che sultan Selim era morto, e 'l Gazelli s'era fatto lui eridar Soldan del paese, et ha preso il castello de Damasco et morto assai turchi, et a li 2 di questo dovea montar a cavallo per venir de qui, et avea mandato grande exercito a la via de Aleppo, ben persone 9000, et la sua persona dovea venir de qui *cum* bona parte di le zente per pigliar questo castello et andar de longo in Aleppo; de che spero in Dio che le cosse de breve anderano bene. Lo signor de Aleppo è stato tagliato a pezi con tutti li turchi erano con lui. Lo signor de qui s'è partito con cavali 1000, et non habiamo potuto intender dove sia andato; ma habiamo inteso ne sia stato morto assai de lori